

## **Luuszäpfe SBB Uffdryyt, Merz 2018**

**Es het vyll z'wenig Huusärzt umme, das isch e Brobleem  
die junge Ärzt wänn nimm so schaffe, und sinn vyll z'bequem.  
Drum gang ich neu zum Tierarzt, dä ka das schliesslig au,  
denn mi Frau sait sowieso: „Benimmsch di wie ne Sau!“**

**Heugumper, Grille, Würmli ässe kasch jetzt offiziell.  
Die Viecher sinn mir nonig gwohnt, das isch sehr speziell.  
Do sait sich's Anni vo dr Metzger: „Das find ich gar nit mies:  
Ka Fleisch mit Made drin verkaufe, zum zwaifache Pryys!“**

**"Fir d'Metzger kennt's nit besser sy  
Jetzt lauft dr s'Flaisch grad hindedry....."**

**Dr Donald Duck schreyt und tobt, är stampft voller Wuet.  
Si Gesicht wird rot und röter, jetzt lüpft's em grad dr Huet.  
Är isch so hässig, dass är alles Züüg duet ummeschmaisse:  
Är will wägem US-Trump(el) nimme Donald haisse.**

**E Toi Toi-WC samt Papier, drzue ebbis zum Ässe  
Zwai Akku und au s'Handy deerfsch ganz sicher nit vergässe  
E Schloofsack und e Warnweschte, zum Lääse no zwai Biecher  
E Kilosack voll Läggerli, Wanderschueh und Diecher.  
Baldriandropfe und drzue e gueti Fläsche Vino:  
Nur mit all däm Züg derby stieg ych in Cisalpino.**

**E ICE het in Basel drey Daag d Glais blockiert.  
Worum hänn mir jetzt uusegfunde und grad rapportiert:  
Dr Lokfierer het sich verfaare und isch nur entglaist  
will är brav em Navi folgt, wo's: „Bitte wenden!“ haisst.**

**Ich bi im Zug, muess dringend goo, doch s'WC isch „defeggt“.  
Denn lauf ich halt zum neggschte, wo hänn si das versteggt?  
Doch das isch laider au „defeggt“ - ich lauf so witt wie's goot  
erscht s'allerletschte funggtioniert, nur doof... jetzt isch es z'spoot.**

**D SBB het Brobleem (näb de Riiseschulde).  
Sie hänn vyll z'wenig Lokifierer – s'SOPRE ghört in d'Mulde.  
Zum Spaare wänn si jetzt au d'Züüg elai lo ummefaare**

**Vyyl besser wär me wurd'y sich - dä Diräggtter spaare!**

**Willsch Du näggschdens uff de Schiine Waare transportiere  
d'Cargo vo dr SSBeeBee ka das offeriere.  
De griegsch e Super-Spar-Pryys, wotsch Du bi dene bestelle:  
muesch aifach numme Wääge, Lok und Lokifierer stelle!**

**Digitalisiere haisst: Ohni PC goot nüt.  
Dä kennt als Sprooch nur Null und Ains – so rede nit vyll Lüt.  
Dass das nit funggtioniert merggsch bi dr SBB am Gwinn,  
dr Grund isch dass die wo's hänn welle alles Nulle sinn.**

**D SBB baut Personal ab – das närvt uns am meischte  
drum mien die wo übrig bliibe immer no mee leischte.  
Au d Lokifierer griege jetz e Näbejob, e tolle:  
Vor dr Abfaahrt mache sie no schnäll Billjeekontrolle.**

**D' SBB spart und spart, spart und spart und spart,  
spart und spart, und spart und spart und spart und spart und spart.  
Mir nämme uns e Byspyyl dra und mache s'Glyyche au  
.... sali zämme!**